



盛京通志卷之三十一



藝文

尚書稱堯曰文思舜曰文明禹曰文命帝王以  
人文化成天下蓋綦重哉畱都自

列聖肇興以來

綸紵所布皆典謨誓誥之遺煥乎殆麗日星而昭雲  
漢矣他若古今屬詞揆藻亦不乏人序紀所存  
聊資考證題詠所寄亦備輶軒遴其雅馴附登  
卷末良以廣文治云作藝文志

皇清御製

詔

世祖章皇帝登極恩詔

順治元年

奉

天承運

皇帝詔曰我國受

天眷佑肇造東土

烈祖邁圖鴻緒

皇考彌廓前猷遂舉舊邦誕膺

新命迨朕嗣服雖在冲齡締念紹庭永綏厥位頃緣

賊氛洊熾極禱明朝是用託重親賢救民塗炭乃

方馳金鼓旋奏澄清旣解倒懸非富天下而王公

列辟文武羣臣暨軍民耆老合詞勸進懇切再三

乃於今年十月初一日祇告

天地

宗廟

社稷卽皇帝位仍建有天下之號曰大清定鼎燕京紀

元順治緬維峻命不易勦業尤艱况當改革之初

更屬變通之會爰乃酌今準古揆天時人事之宜

庶幾吏習民安彰

祖功

宗德之大所有合行條例臚列如左

郊

天配

祖詔 順治五年

奉

天承運

皇帝詔曰大一統之業禮莫重於配

天通孝思之誠情莫切於尊

祖謹於順治五年十一月朔八日冬至恭祀

天於南郊奉

太祖承天廣運聖德神功肇紀立極仁孝武皇帝配饗

即於是日推本

孝思追尊

太祖以上四世

高祖澤王為

肇祖原皇帝

高祖妣為原皇后

曾祖慶王為

興祖直皇帝

曾祖妣為直皇后

祖昌王爲

景祖翼皇帝

祖妣爲翼皇后

考福王爲

顯祖宣皇帝

妣爲宣皇后典禮綦隆覃恩宜廣特大赦天下以慰官

民應行事宜條列於後

今上登極詔

順治十八年

奉

天承運

皇帝詔曰惟我國家受

天眷命

祖功

宗德肇造丕基我

皇考大行皇帝盛德至仁英資大度纘承曆數統一寰

區恩澤洽於多方政教臻於上理方期邦國永底

雍熙不幸奄棄臣民遽升

龍馭顧以大寶屬於藐躬朕筮筮在疚本不忍聞而

諸王貝勒大臣文武官員人等僉謂神器旣已攸

歸天位不宜久曠堅請再三朕是以俯徇輿志勉

抑哀衷於是月初九日祇告

天地

宗廟

社稷卽皇帝位仰惟

上天眷祐之篤

祖宗付託之隆涼德冲齡膺茲重寄敬圖觀光揚烈用  
紹無疆之休其以明年爲康熙元年與天下更始  
式衍舊恩聿弘新化所有合行事宜開列於後

今上親政詔

康熙六年

奉

天承運

皇帝詔曰朕以冲齡嗣登大寶輔政臣索尼蘇克薩  
哈邁必隆鰲拜謹遵

皇考世祖章皇帝遺詔輔理政務殫心効力七年於茲  
今屢次奏請朕承

太皇太后之命躬理萬幾深惟

天地

祖宗付託甚重海內臣庶望治方殷朕以涼德夙夜祇  
懼天下至大政務至繁非朕躬所能獨理宣力分  
猷仍惟輔政臣諸王貝勒內外文武大小各官是

盛京通志 卷之第三十一 五  
賴務各殫忠盡職潔已愛民任怨任勞不得辭避  
天下利弊必以上聞朝廷德意期於下究庶政舉  
民安早臻平治凡我軍民宜仰體朕心務本興行  
樂業安生以迓休寧之慶合行恩赦事宜條列於  
後

冊立

皇太子詔 康熙十四年

奉

天承運

皇帝詔曰自古帝王繼

天立極撫御寰區必建立元儲懋隆國本以綿宗社無

疆之休朕纘膺鴻緒夙夜兢兢仰惟

祖宗謨烈昭垂付託至重承祧衍慶端在元良嫡子胤

初日表英奇天資粹美茲恪遵

太皇太后

皇太后慈命載稽典禮俯順輿情謹告

天地

宗廟

社稷於康熙十四年十一月十三日授胤祜以冊寶立

爲

皇太子正位東宮以重萬年之統以繫四海之心  
大典告成洪恩宜霈所有合行事宜開列於後  
册立

皇太子上徽號詔

康熙十五年

奉

天承運

皇帝詔曰朕維帝王綏理萬方首崇孝治尊親之典  
因事加隆至建立元儲懋敦國本尤必推原懿德  
上晉徽稱此歷代不易之盛軌也欽惟我

聖祖母昭聖慈壽恭簡安懿章慶敦惠溫莊康和太皇

太后佐

皇祖太宗文皇帝肇造丕基啓

皇考世祖章皇帝恢弘大業

聖母仁憲恪順誠惠皇太后母儀茂著克嗣徽音朕奉  
事

慈闈並承

訓育紹基圖治宵旰靡寧茲者祇遵

懿命册立皇太子禮成仰惟

垂裕之仁式舉

顯揚之典謹告



天地

宗廟

社稷於康熙十五年正月十一日率諸王貝勒文武羣

臣恭奉

冊寶加上

聖祖母昭聖慈壽恭簡安懿章慶敦惠溫莊康和太皇

太后徽號曰

昭聖慈壽恭簡安懿章慶敦惠溫莊康和仁宣太皇太

后

聖母仁憲恪順誠惠皇太后徽號曰

仁憲恪順誠惠純淑皇太后慶禮告成恩綸宜霈所有

應行事宜開列於後

平定雲南詔

康熙二十年

奉

天承運

皇帝詔曰朕纘承丕緒統御寰區仰惟

天地眷佑之庥

祖宗付託之重

聖祖母太皇太后慈訓之殷蚤夜孜孜勤求化理期於

兵革寢息海寓乂安不意逆賊吳三桂負國深恩

倡爲變亂陰結奸黨同惡相援抗違詔令竊據疆  
土滇黔閩浙楚蜀關隴兩粵豫章之間所在驛騷  
肆騁痛毒三桂僭稱僞號逆焰彌滋負罪尤甚朕  
躬行天討分命六師勦撫並施德威互濟或繫頸  
於闕下或駢戮於師中擒捕誅鋤以次收服乃三  
桂旣膺神殛逆孫世璠猶復鴟張踞六詔之一隅  
延殘喘以拒命朕惟賊患一日不除則民生一日  
不靖策勵將士屢趣師期於是虎旅協心進逼城  
下賊衆計窮勢蹙通欵軍門約日獻城兇渠授首  
師克之日市肆不擾邊境晏如捷書旣至上慰

郊

廟

社稷之靈下抒中外臣民之憤神人胥悅遐邇騰歡念

自變亂以來軍民荼苦如在水火披堅執銳卒歲  
靡寧行賫居送千里相望被兵之地旣罹於鋒刃  
供億之衆復困於征輸朕憫恤民艱不忍輒加額  
賦間施權宜之令用濟征繕之需意在除殘事非  
獲已而身處宮寢之內厯懷閭閻之依中夜屢興  
盱食不暇怒焉思治八載於茲今羣逆削平疆圉  
底定悉剪歷年之蝨賊永消異日之隱憂用是蕩

滌煩苛維新庶政大沛寬和之澤冀臻熙皞之風  
所有事宜開列於後

平雲南上徽號詔  
康熙二十年  
奉

天承運

皇帝詔曰朕惟帝王纘承鴻緒首重尊親顯號薦加  
彝章具在矧式遏禍亂耆定厥功實稟誨育之恩  
應極尊崇之典比者逆賊吳三桂反叛煽動多方  
朕夙夜靡寧肆張天討仰承

聖祖母昭聖慈壽恭簡安懿章慶敦惠溫莊康和仁宣

太皇太后

聖母仁憲恪順誠惠純淑皇太后懿訓次第剪滅克奏  
蕩平上慰

宗廟之靈下拯生民之厄非藉

慈庇曷克臻茲用晉休稱載揚  
盛德謹告

天地

宗廟

社稷於康熙二十年十二月二十四日率諸王貝勒文  
武羣臣恭奉

冊寶加上

聖祖母昭聖慈壽恭簡安懿章慶敦惠溫莊康和仁宣  
太皇太后徽號曰

昭聖慈壽恭簡安懿章慶敦惠溫莊康和仁宣弘靖太  
皇太后

聖母仁憲恪順誠惠純淑皇太后徽號曰

仁憲恪順誠惠純淑端禧皇太后禮既備於

兩宮澤宜敷於四海所有應行事宜開列於後

碑文

肇祖原皇帝碑文

粵稽書稱觀德詩咏發祥莫不由本支而遡厥初  
生祇享假以垂夫來葉既隆報本之典亦昭受命  
之符洪惟我

肇祖原皇帝暨

原皇后德合天地功配陰陽似后稷聿始周謨同帝嚳  
肇開唐業啓迪

列聖雄圖衍百禩家傳默祐冲人大統懋九圍帝業顧  
瞻

陵廟彌嚴祇敬之心鐫勒碑銘益篤靈承之慶卜年卜  
世光華宣著千秋以祀以禋繼述遐昌奕代昭垂

有永申錫無疆

興祖直皇帝碑文

稽承家之遐慶遡開國之鴻圖積德累仁發祥有  
自肇基垂統錫祉無疆洪惟我

興祖直皇帝暨

直皇后誕樹厥德聿宣乃武雖大勲未集而經綸已建  
當草昧初開而謨烈允光令緒昭垂皇圖式啓迨  
予冲人承茲丕緒蒞九土之率從合萬邦之愛戴  
陵原重建洽篤祐之歡心

廟貌鼎新彰開天之盛烈永錫遐祚萬禩承庥

景祖翼皇帝碑文

粵稽祖德攸崇爰啓承家之緒宗功有永益隆篤  
祐之思蓋追盛業以遡開天宜紀鴻勳以昭受命  
旣彰發祥之有自更申錫福之無疆洪惟我

景祖翼皇帝暨

翼皇后弘謨大烈厚澤深仁雖未集耆定之勲而不宣  
有象實始建經綸之業而式廓用光令緒丕昭已  
見六州歸命皇圖肇造先占率土傾心

原廟重新弓劍衣冠皆起羹墻之慕

山陵永奠子孫臣庶咸蒙佑啓之仁爰勒豐功作本支

之百世載揚休烈錫嘉祉於千秋繼述遐昌昭垂不替

顯祖宣皇帝碑文

蓋惟天肇一代之運必著開先啓後之勲聖垂百世之模必有積德累仁之實丕基方建締造惟勤大業式弘駿鴻宜勒用申報本之典益彰受命之符洪惟我

顯祖宣皇帝暨

宣皇后文謨丕顯武烈載揚星流華渚已秉赤日之祥電繞辰樞更兆神龍之瑞雖皇猷肇啓大勲未遍

於寰區而帝緒昭垂聖德實留乎奕禩橋山載闢百千載無斃明禋

原廟重新億萬年用鐫令烈承庥有永佑祚無疆

以上俱係

永陵碑文

興京顯祐宮碑文

自古帝王統御天下必以仁義爲本尤懋恭肅而崇祀明神蓋期國祚熙昌俾兆民罔不康寧之故欽惟神莫大於

昊天而事莫隆於開創虔恪之志益當加倍尋常惟茲興京所建

顯祐宮始於締造之初昭事

上帝之所其關甚重運祚靈長神實啓之臣民瞻仰神實迪之是以國家膺圖御籙固我

太祖武皇帝

太宗文皇帝開駿業而肇鴻基本仁義而施政教所致然荷茲

天眷者豈非誠敬萬靈懷柔河嶽之故歟是以

天無所不在事

天之心卽無時不謹稽王業所自始地擅神臯邈

祖德所潛通歆居

上帝朕夙夜寅恭冀登上理瞻念受命發祥之地益深

欽

天率

祖之思已命所司繕整惟新春秋禋祀載表功德樹豐碑以傳不朽於戲艱難不昧常懷對越之誠丹雘不章永保岡陵之固後之子孫臣庶其無怠朕敬事之意焉

盛京景祐宮碑文

自古帝王之興莫不首隆祀典凡有功德於民者皆爲建壇宇而通盼嚮蓋神旣佑民以福國則國

必崇祀以報神此廟貌之所由隆也我

太祖

太宗手定大業拯斯民於塗炭膺景祚之綿長雖積功累仁所致而百神之靈實式憑之

大清門東三官廟尤神最顯赫而及民功德為最著者考之道書三官廟之神有天地水府之別國家當干戈擾攘之際急圖康阜使時和年豐室廬相慶則天官賜福主之其或貫索未空金氣猶沴使斯民秉德格非遠刑罰而登仁壽則地官赦罪主之又或大軍之致凶年大荒之致奇疫滌其毒災

而消其害氣則水官解厄主之然則使民富使民樂利使民康寧而因以默祐我邦家孰非神之賜也歟嗚呼發祥重地永藉呵護之靈凡我生民咸蒙乂安之福爰命勒石用表神功以垂不朽云

祭告文

祭告長白山文

惟

神傑峙東維協扶景運疏江滙海薦瑞凝祥著靈異於萬年溥蕃滋於庶類精英永播秩祀常新時惟

仲春秋謹具牲醴庶品用申專祭尚饗



朕惟國家受命凝庥則山川百神罔不協瑞矧溯  
興王之迹推翊運之祥尤宜肇舉明禋誕加顯號  
蓋自天作高山形於歌頌其來舊矣惟

神秀結東垂澤均厚載濬發三江之胙廣延千里之  
區極敷雲洩雨之奇弘濟物利民之用神山異蹟  
祭莫有與京仰緬

列祖龍興實基此地殊禎萃於盛世寶曆奠於萬年爰  
念靈符應申昭報朕茲博採彛章折衷禮制特封  
爲

長白山之神載諸祀典 神其益彰英爽丕贊昌期

尚歆時享於春秋永集鴻禧於

宗社專官告祭惟 神鑒知

祭告北鎮醫巫閭山文

維 神屹立營州巍凌華表飛泉瀉洞育物福民  
朕誕膺

天命祗荷神庥特遣專官用申殷薦惟 神鑒焉 順

治十八年

維 神屹立營州巍峻遼海飛泉瀉洞育物福民  
朕躬親政務祗荷神庥特遣專官用申殷薦惟  
神鑒焉 康熙六年

維神傑峙營州雄蟠遼海發祥兆迹王氣攸鍾  
朕承神祐疆宇蕩平特遣專官用申殷薦惟神

鑒焉 康熙二十一年

祭遼太祖文 康熙二十一年

天自古帝王受

天顯命繼道統而新治統聖賢代起先後一揆成功

盛德炳如日星朕誕膺

眷祐臨制萬方掃滅兇殘廓清區宇告功古后殷禮

肇稱敬遣專官代將牲帛爰修禋祀之誠用展景

行之志仰企明靈尚其鑒享

歷代御製

詔

金

太祖諭內外諸軍都統杲詔

遼政不綱人神共棄之欲中外一統故命汝帥大  
軍以行討罰爾其慎重兵事擇用善謀賞罰必行  
糧餉必繼勿擾降服勿縱俘掠見可而進無淹師  
期事有從權毋須申稟

太祖撫諭遷民詔

郡縣今皆撫定有逃散未降者已釋其罪更宜招

盛京通志 卷之第三十二  
諭之前後起遷戶民去鄉未久豈無懷土之心可  
令所在有司深加存恤毋輒有騷動衣食不足者  
官賑貸之

太祖諭東京諸路詔

頃因兵事未息諸路關津絕其往來今天下一家  
若仍棄之非所以便民也自今顯咸東京等路往  
來從其便其間被畧及鬻身者並許自贖爲良仍  
令馳驛布告

元

成宗加封五鎮詔

三代以降九州皆有鎮山所以阜民生安地德也  
五嶽四瀆先朝已嘗加封惟五鎮之祀未舉殆非  
敬恭明神之義其加東鎮沂山爲元德東安王南  
鎮會稽山爲昭德順應王西鎮吳山爲成德永靖  
王北鎮醫巫閭山爲貞德廣寧王中鎮霍山爲崇  
德靈應王仍勅有司歲時與嶽瀆同祀著爲定式  
故茲詔示

明

太祖正神名號詔

自有元失馭土宇分裂聲教不同朕奮起布衣以

安民爲念訓將練兵平安華夏天統以正永惟爲  
治之道必本於禮考諸祀典知五嶽五鎮四海四  
瀆之封起自唐世崇名美號歷代有加在朕思之  
則有不然夫嶽鎮海瀆皆高山廣水自天地開闢  
以至於今英靈之氣萃而爲神必皆受命於上帝  
幽微莫測豈國家封號之所可加黷禮背經莫此  
爲甚至如忠臣烈士雖可以加封號亦惟當時爲  
宜夫禮所以明神人正名分不可以僭自今依古  
定制凡嶽鎮海瀆並去其前代所封名號止以山  
水本名稱其神郡縣城隍神號一體改正歷代忠

臣烈士亦依當時初封以爲實號後世溢美之稱  
皆與革去其孔子善明先王之要道爲天下師以  
濟後世非有功於一方一時者可比所有封爵宜  
仍其舊庶幾神人之際名正言順於理爲當因稱  
朕以禮事神之意所定各神名號開列於後

一五嶽稱東嶽泰山之神南嶽衡山之神中嶽嵩  
山之神西嶽華山之神北嶽恒山之神

一五鎮稱東鎮沂山之神南鎮會稽山之神中鎮  
霍山之神西鎮吳山之神北鎮醫巫閭山之神  
一四海稱東海之神南海之神西海之神北海之

神

一四瀆稱東瀆大淮之神南瀆大江之神西瀆大河之神北瀆大濟之神

一各處府州縣城隍稱某府城隍之神某州城隍之神某縣城隍之神

一歷代忠臣烈士並依當時初封爵名稱之

一大小神祠無功於民不應祀典者卽係淫祠有司勿得致祭嗚呼明則有禮樂幽則有鬼神其理旣同其名當正故茲詔示咸使聞知

敕

明

成祖建北鎮廟敕

北鎮醫巫閭山之神自昔靈應彰顯而爲國祐民厥績尤著獨其廟宇至今弗克修治朕心倦切夙夜弗忘敕至爾等擇日興工建立祠宇飾嚴祀事以稱朕崇仰之意故敕

文

金

世宗冊封長白山文

自兩儀剖判山嶽神秀各鍾於其分野國將興者

天實作之對越神休必以祀事故肇基王迹有若  
岐陽望秩山川於稽虞典厥惟長白載我金德仰  
止其高實惟我舊邦之鎮混同流光源所從出秩  
秩幽幽有相之道列聖蕃衍熾昌迄於太祖神武  
徵應無敵於天下爰作神主肆予冲人紹休聖緒  
四海之內名山大川靡不咸秩矧王業所因瞻彼  
早麓可儉其禮服章爵號非位於公侯之上不足  
以稱焉今遣某官某持節備物册命茲山之神爲  
興國靈應王仍敕有司歲時奉祀於戲廟食之享  
巨萬億年維金之禎與山無極豈不偉歟

世宗册封混同江文

昔我太祖武元皇帝受天明命掃遼季荒蕪成師  
以出至於大江浩浩洪流不舟而濟雖穆滿渡江  
而龜梁光武濟河而水冰自今觀之無足言矣執  
徐之歲四月孟夏朕時邁舊邦臨江永嘆仰藝祖  
之開基佳江神之効靈至止上都議所以尊崇之  
典蓋古者五嶽視三公四瀆視諸侯至有唐以來  
遂享帝王之尊稱非直後世彌文而崇德報功理  
亦有當然者矧茲江源出於長白經營帝鄉實相  
典運非錫以上公之號則無以昭答神休今遣某

官某持節備物冊命神爲興國應聖公申命有司  
歲時奉祀於戲嚴廟貌正封爵禮亦至矣惟神其  
衍靈長之德用輔我國家彌億年神亦享廟食於  
無窮豈不休哉

明

英宗禱雨告北鎮廟文

予奉天育民愧涼於德致茲从旱災及羣生夙夜  
省躬中心惓切神司方鎮憂憫諒同雨農於晴宜  
在其手特茲致禱尚冀感通弘布甘霖用臻豐稔  
匪予之惠時乃神庥

憲宗告北鎮廟文

國家欽奉神明聿嚴祀事所期默運化機庇佑民  
庶乃近歲以來或天時不順或地道欠寧或雷電  
失常雨暘爽候或妖孽漸作疫癘交行遠近人民  
頻遭饑饉流離困苦痛何可言惕然於中罔知攸  
措惟神奠鎮一方民所恃賴睹茲災沴能不疚心  
是用特具香幣遣官祭告尚冀體上帝好生之德  
鑒予憂元元之意幹旋造化弘闡威靈捍患禦災  
變禍爲福庶幾民生獲遂享報無窮惟神鑒之

孝宗禱雨告北鎮廟文

伏自去冬無雪今春少雨田苗未能播種民庶實相憂惶予甚兢惕用是側身修省虔致禱祈惟神矜憫小民幹旋大造早霈甘霖以滋禾稼以濟民艱庶年有豐稔之祥則神亦享無窮之報

武宗平寧藩告北鎮廟文

去歲以來寧孽作逆命官致討逆黨就擒內變甫清中外底定匪承洪祐曷克臻茲因循至今未申告謝屬者四方多事水旱相仍餓莩載途人民困苦盜賊嘯聚勦捕未平修省咎由實深兢惕伏望神茲昭格幽贊化機災沴潛消禎祥叶應永庇生

民

世宗卽位告北鎮廟文

惟神功參造化永鎮北土奠安民物茲予嗣承大統謹用告祭神其歆鑒佑我國家

辭

金

世宗幸上京歌辭

猗歟我祖聖矣武元誕膺明命功光於天拯溺救焚溪根固蒂克開我後傳福萬世無何海陵滯昏多罪反易天道荼毒海內自昔肇基至於繼體積



金京通志 卷之第三十一  
累之業淪胥且墜望戴所歸不謀同意宗廟至重  
人心難拒勉副樂推肆予嗣緒二十四年菟業萬  
幾億兆庶姓懷保安綏國家閒暇廓然無事乃眷  
上都興帝之第屬茲來游惻然予思風物減耗殆  
非昔時于鄉于里皆非初始雖非初始朕自樂此  
雖非昔時朕無異視瞻戀慨想祖宗舊宇屬屬音  
容宛然如睹童嬉孺慕歷歷其處壯歲經行恍然  
如故舊年從游依稀如昨歡誠契濶旦暮之若吁  
嗟濶別兮云胡不樂

詩

唐

太宗遼城望月

元菟月初明澄輝照遼靄映雲光暫隱隔樹光如  
綴魄滿桂枝圓輪虧鏡彩缺臨城卻影散帶暈重  
圍結駐蹕俯九都佇覩妖氛滅

疏

元

學士虞集條陳疏

自京師東瀕海數千里北極遼海南濱青齊荏葦  
之場海潮日至淤爲沃壤用浙人之法築堤捍水  
爲田聽富民欲得官者合其衆分授以地官定其  
畔以爲限能以萬夫耕者授以萬夫之田爲萬夫  
之長千人百人亦如之察其惰者而易之一年勿  
征也二年勿征也三年視其成以地之高下定額  
於朝廷以次漸征之五年有積蓄命以官就所儲

盛京通志 卷之第三十二  
給之常祿十年佩之符印得以傳子孫如軍官之例則東面民兵數萬可以內衛京師外禦島寇遠寬海運以舒疲民遂富民得官之志而獲其用江海游食之徒皆有所歸矣

御史陳思謙建言疏

遼海延袤千里地高氣寒水甘泉美無非牧養之地宜設置郡牧使司統領十監專治馬政並畜牛羊數年之後馬實蕃盛或給軍以壯兵威或給站以優民力牛羊之富又足以給國用非小補也  
明

御史曾銑戡定三城疏

頃者廣寧遼陽二城軍士變亂其根因情狀前疏已言其畧矣臣參議遼陽軍變事因有激心實無他又該兵部覆題地方事情止遣大臣查勘凡諸進言興兵征勦之策一切不用是於人心惶懼之秋爲平定安戢之道誠宜如此不然則沮脅從者自新之路矣况兵凶戰危未可輕試觀諸往者大同之禍起於制帥之喜事成於用兵之寡謀遂致智勇俱廢卒無成功得失昭然監戒不遠奈何逆軍無忌自棄生成一聞大臣將來互相鼓扇旣約

閉二鎮之城以要赦又欲援大同之例以需賞假洗城之說爲聚衆之謀布妖言以惑人心攀重囚以爲謀主是數逆軍者其始也因激而倡亂雖無素謀其旣也負罪而逞兇漸成不軌臣竊思之一成而不可假者國之法也難制而易於縱者人之情也苟上有假借之法則下多放縱之情往者陝西之軍變未幾而復有大同之變說者曰大同之變所以處陝西之變者啓之也大同殺叅將殺巡撫未幾而又有殺總兵之變說者曰李瑾之變所以處張文錦之變者啓之也蓋惠竭矣而威或不伸威行矣而法或未盡蠢茲小醜習於耳目所以撫臣一旦乖方而軍士之騷動肆起凡以法不足以懾服而人情日流於驕悍故也今者仰賴處置得宜開諭明切故首惡就擒邊境之危殆者已安人心之動搖者咸定此誠諸鎮觀望之候也臣愚以爲祖宗立法所以警服姦兇今諸鎮之軍不數年而亂者屢起此豈法之不善哉抑亦議法者之未盡爾夫明罰敕法者先王之道也小懲大誡者小人之福也伏望皇上燭後慮遠拔本塞源重春秋無將之義嚴臣子大亂之防乞將臣言議行惟

據兇逆之原情以盡律例之長法至於應叅職官  
悉從重究則威行於恩外威震而恩益深仁盡於  
義中義明而仁益篤動切事幾之會潛消姦宄之  
萌地方永保無虞矣

御史周斯盛發帑救荒疏

臣照得遼東地方三面距邊一面瀕海商賈舟楫  
未通往歲秋成粒米豐稔既無外省之移足克本  
鎮之用故地方號爲富庶而人家不事儲蓄間有  
一二災傷尚可自活自嘉靖三十六年大水以後  
一望成湖子粒未獲遠近居民家家缺食鬻妻棄  
子流離載道入冬以來日甚一日斗米值銀五錢  
且數日市無販糴民愈窘迫始則掘食土麵繼而  
遂至相食壯者肆行劫掠無所顧忌法禁不能止  
積孳狼藉不忍見聞臣叨巡茲土寢食靡遑盡括  
公貯平糴穀粟煮粥施賑但邊方庫藏素無蓄積  
所濟不足以當百分之一今東作之時阡陌蕭然  
旣鮮牛力又乏子種生全之望已屬無期况屯糧  
力役之征幫軍買馬之費追併嚴急竟使枵腹待  
斃情甚可憐本鎮兵馬素稱可用近因糧賞久欠  
調征頻煩已有積弱之漸加以歲之饑僅供應不

敷死亾逃竄無日無之計一營不及原額之半而馬更少少沿邊戍守十存一二使之奔走服役亦不能前而况資之以爲戰守哉昨該臣等題請加添月糧折色荷蒙皇上俯賜允給全遼軍民不勝感戴但飢餒至極給發未多一軍所領不足以爲旬日之資嗷嗷之衆日見倉皇號令爲之不行夫軍所恃以爲生者應得之糧賞戶丁之供幫耳今上不能仰給於公下無所資助於戶相繼逃亾勢所必至屯妨耕種之期路有劫奪之梗緩急之際誰復爲用况此地寒不生麥夏初始種秋半始獲若穀則更晚矣計其餬口之日尚遠若非破格拯救恐未能有濟也且天下之事圖之於未形則力易而費省救之於已著則費滋而力難以是孤絕無援之地釋今不爲之處使飢餒填乎溝壑逃亾盡乎什伍乃從而招募爲費何如收之於旣渙扶之於旣頽爲力何如矧外患熾於甓陵內禍起於急迫尤有不可言者則將何以處之臣極知帑藏空虛委難處辦但前項重情勢在燃眉誠有不能已者伏望皇上軫念全遼爲畿甸左翊關係甚重邊方赤子困苦已極時日難待敕下該部從長計議

速發帑銀五六萬兩星夜差官解運前來聽臣等酌量分發賑濟以救倒懸之急仍將軍士歷過糧賞查數給發庶幾生全有望戰守可資人心恃以相安重鎮賴以永固矣

敘

明

都御史李承勳醫閭先生集敘

予昔從伯氏世卿子大崖山中讀書至古之學者爲已大崖慨然嘆而問曰今天下有若人乎予未能對復嘆曰白沙陳先生公甫醫閭賀先生克恭

真其人也吾將焚舉子業從之遊越數載還自白沙稱其緒論以爲人心通塞之幾生生化化之妙有非見聞所及者必深思而自得之未易言也白沙之學以自得爲宗喫緊工夫全在涵養端居靜坐不爲私妄間隔至心虛氣靈天理流通大本立矣喜怒未發而非空萬感交集而不動舍是則滯礙於形器支離於咕嗶力愈勞而心愈亂不足以語道矣故其詩云吾能握其機安用窺塵編先生之學亦出陳氏在諫垣時聞爲已端默之旨篤信不疑謝病歸構小齋讀書其中隨事體驗未知其

要潛心玩味杜門不出者十餘年乃見實理克塞無間化機顯行莫非道體事事物物各具本然實理吾人之學不必求之高遠在至敬以收放心勿忘勿助循其所謂本然者而已故爲臣必盡其忠爲子必盡其孝推之家庭里閭間冠婚葬祭服食起居必求本然之理而力行之久从純熟心跡相應不期信於人而人自信有邊將撲殺獻績者見先生卽吐實曰不忍欺也城中亂卒焚劫不入其坊人扶先生往諭之衆見卽羅拜而泣曰吾父也遂解散待罪城賴以全非盛德能至是乎嘗並而論之二先生之學均於爲己白沙資質高明而虛靜涵養之益爲多故所見高妙至其德立道尊體任自然從容和易不事矯飾不善學者見其暮年氣象之可親而不知其早歲自治之甚力憚深思而欲徑造自然怠克治而欲妄效和易故多流於放蕩先生性本篤實其學主於躬行循循然自下學始法地之下以固其基法地之廣以聚其業如是而自治如是而誨人如是而始如是而終篤實之積光輝發外傑黠者心服而獻誠叛亂者醉德而革面予昔撫東土訪先生之閭見其子進士士



盛京通志 卷之第三十二  
三  
諮文行不忝所生又聞有老門生百戶胡溪者亟  
欲招致匿不肯見先生之風高矣遠矣今夏士諮  
輩錄先生言行詩文奏議共若干卷遺余於戲先  
生之學本不可以言語文字求今先生往矣舍言  
語文字何可以見先生之心謹敘而傳之先生諱  
欽世爲定海人以戌籍隸遼之義州衛登成化丙  
戌進士任戶科給事中養疾回隱居醫閭山下克  
恭其字也遼人無老少貴賤至今稱爲醫閭先生  
云

御史程啓克定三城敘

功名之際人之所開也殘慢之習政之所激也遲  
速之宜幾之所投也是以君子致覽焉石塘曾子  
舉進士拜縣令擢御史來按遼東當是時呂九州  
爲巡撫乙未春御史南巡都御史北巡會於海州  
相得甚歡也已乃御史行而南都御史行而北北  
抵開原而返遼陽又兩日而難作時御史尚在熊  
岳報至趨歸馳檄往諭門啓檄入張檄衆號檄下  
仆旗息鼓坐甲解橐鞬釋官吏縛奉呂中丞入居  
都司衆驚曰御史至矣登陴走集日四五起遠近  
風靡列城響應御史兼程至官屬父老走逆入院

諸叛卒嗷嗷待命軍民啼泣陳說御史慰勞父老  
問所便宜更張之人人自喜曰御史愛我也往陪  
呂中丞移之行臺上言曰臣待罪邊圉邊人弗靖  
敢干制使罪唯在臣愚民不足誅唯聖明矜宥詔  
勿問諸臺諫請用師遣工部侍郎林公來按是月  
丙辰廣寧再變其夜撫順劫辱主帥御史復上狀  
朝野洶洶司馬憂益劇御史日事拊循渙其羣佯  
莫與較物色大憝稽其所往來謀稍解七月甲子  
晨集將校官屬下令曰三城干紀罔治脅從首亂  
者死其捕之國憲毋登叛人左右相顧翫舌御史  
出袖中姓名分配校卒卽走西城指授未移晷面  
縛八人明日撫順擒七人來獻又明日計殺陳羊  
兒陳羊兒者倡亂廣寧者也驍悍難敵故先事收  
之丁卯再擒十有二人後先遲速悉仰成算地方  
底綏反側震悚御史復上言曰遼東三變臣不佞  
見大同失畫屠戮慘毒臣欲以計滅賊故請勿問  
臣憤恨不敢忘已討擒元惡二十七人殺一人取  
其首賴陛下神靈軍民帖服唯臣死罪死罪天子  
覽之喜詔司寇議辟詔冢宰陟御史大僚詔司馬  
論功賞詔使者還別遣御史勘奏敕至遼人呼曰

微公吾爲大同矣我東人曷以報公諸父老請建  
生祠御史不許請肖像俎豆之又不可請爲文紀  
實御史又謝乃守臺下不去御史曰父老且休予  
方辭功請罪未遑也諸父老乃以李張二生來蒲  
河謁予以狀啓克受狀太息曰嗟乎事幾之不可  
失也邊兵構患始寧夏而甘肅而大同當其時非  
無撫按也特以處置失宜玩兵激寇損師累月費  
數十萬殺傷數萬俾朝廷肝食可慨也唯遼變起  
三城五路震撼先是御史請勿問悉解關鑰予心  
竊疑之比寓書於予曰茲舉終當別圖先生幸教  
我也予固謝未省也及其赫然決策不假兵革羣  
兇就繫弭兵裕民萬全無害雖古管葛豈其過之  
孔子不云乎必也臨事而懼好謀而成者也乃知  
諸鎮之變唯無人焉當患而謀以致喪師糜財禍  
亂薦作絜此相度弘濟孰多父老俎豆之朝廷爵  
賞之不亦宜乎

記

明

浮梁盧瓊石塘曾公生祠記

君子之道有三正志定畧仁及衆也書曰艱大考

翼不可征定亂難也而况倉卒之變乎維忠以正志耳又曰倚乃身迂乃心安民難也而况遠邇一致乎維智以定畧耳又曰式敷民德永肩一心民懷難也而况久思乎維仁以及衆耳三者有一焉皆足以樹勲建名而况兼之乎此遼之人所以生祀曾公也公代巡茲土遼陽戍卒以撫臣革之貞厲窮兇者蝟集爲亂登陴閉門渙無統紀公時自南衛聞變單騎入城諭之禍福衆心以定蓋示包荒用憑河緩窮追之噬散吠聲之黨焉耳乃上疏曰羣兇干紀保無他志願寬斧鉞以開其悔制曰可旣而廣寧撫順相繼以逞公密布而陰偵之無測識者三城首惡同日而俘蓋釋壯鳩受濡愠將欲刑故宥過始終無咎焉耳復上疏曰倡爲亂畧止此數夫願宥其餘以安反側制曰可夫以數百里之亂起於一旦聲色不動而東顧之憂以舒非忠以正志乎先是羽檄旁午朝議咸咈或謂此而不討恐釀藩鎮之亂公曰否非淮西澤潞比也或謂遣使招安且覘競綵公曰否非淳化西州比也以是鋒鏑之禍息而疆境賴以全活者不啻千萬計供億之費省而公私賴以不困者亦不啻千萬

計以東人震驚仰望之私談笑而揮之使背帖於席非智以定畧乎寧遠遼之咽喉東西絡繹晝夜不息苟舉措一失受禍比他衛尤劇征討則有毀體裂肢迺山逾海之患遣使則有負曳鞭撻鬻產市嬰之憂今耕而食者曰公食之也織而衣者曰公衣之也父指其子祖指其孫曰公活之也非仁以及衆乎其師生父老相率而籲於守備陸繼宗備禦袁東陽鳩木礮石立祠於學宮之西偏貌公之像而徵文於瓊或問曰生祠古與曰古也禮也義也公憫無辜之民橫罹斲斫不計生死禍福以身任之力請於朝而得免議民受公之恩非直欲旦暮見公之容而又欲使其子若孫皆知所自禮以義起古之道也昔文潞公澤及天下洛人生祀於資聖院張文定弭盜一方蜀人圖像於益遼之禍起於倉卒深淺成敗不可測而文定自外入又得伸縮自由公視之大難也而公才望日隆安知不爲潞公平公諱銑揚州人石塘其號也

江奎修廣寧左中屯衛學記

衛治西北有廟學自正統元年巡撫李公濬始也公上疏詔立遼之衛學於是錦州委都指揮李真

創建焉成化己亥指揮白欽增修之乙巳戶部郎中毛君泰飭繪聖賢四配十哲像厥後廢修無常嘉靖庚寅大學士張公璉奏正祀典撤塑像易木主更爵號改爲至聖先師千古之非悉革迨今廟學駸廢圯矣己丑巡按李公輔謁廟命亟修之檄僉憲董君世彥議不果董陞任李公亦復命去丙寅巡撫魏公學會至鎮守王公治道又言之巡按李公淑和來試士僉憲何君榮奉檄議修委指揮周之畢董其事發庫銀四十餘兩市材鳩工計估不敷議增八十餘兩乃構正殿五楹作翼道周圍石欄凡二十餘丈東西廡各五楹戟門一楹櫺星門樓三楹戟門之東曰名宦祠西曰鄉賢祠各五楹明倫堂五楹兩齋房十楹堂後敬一亭三楹堂左啓聖祠三楹官舍號房咸秩於理先是櫺星門近逼居民樹屏一面乃令分守參將前守備錦州趙君完易民舍基地南北約五丈餘東西倍之始鑿泮池一區磚橋一座中建石坊外聯石欄又於通衢之東去四十步西去二十步各建坊東之扁曰道冠古今西之扁曰德配天地壯偉華麗視昔加備是役也經始於嘉靖丙寅冬訖事於隆慶己

已秋凡用材以株計則一千有三百石條以尺計則二千有二十甃瓦以片計則五十萬有三千灰以石計則一千有五十鐵以觔計則四百有十餼廩以斛計則一百有六夫役出之丁壯車輛出之屯堡而周子之畢綜理經畫實勞瘁焉然是學之修也而豈徒哉俾諸生睹廟學而修業者非六經無所用心非孝弟無所造就也故曰堯舜之道孝弟而已矣賀醫間先生嘗以白鹿洞規教人而士知學之宗者其亦有聞風而興起者乎

給事中義州賀欽錦州遼右書院記

弘治癸丑秋南燕繡衣樊公按治東土以教育人材爲首務乃選河東西諸生之優等者庠各有差建遼右遼左二書院以分處之讀書其中以相切磨期於僻壤之士咸克造就延學行老成師儒主之復命官典其薪米供億之費院額之扁巡撫張公九雲之所署也樊公臨古宜枉顧病夫請爲記欲成諸生而人斯院辭以鄙陋不足辱命繼而託叅戎金臺王公彥箴懇求不已乃爲一言夫古今之道一而古今之學不能一蓋古之學者將以明此道而體於身足乎已而及乎物非若今之學者

務誦說尚組織要聲光徼利祿而已此義利正邪之分而治道隆汙生民休戚之所係焉者予竊惑焉不能苟同流俗謹取紫陽文公之教於白鹿者躬勉以誨子弟暨館下之生諸人不迂闊之者鮮矣今樊公乃不我迂而惓惓以之爲記公其有意於法古乎則亦遵文公之規而已蓋其所示立教之目爲學之序修身處事接物之要炳然具在至所謂誠明兩途敬義偕立叮嚀之意愈覺深切諸生由是以進高乃志正乃學實乃功以祛習俗趨利之固陋吾知德成而才富體立而用行進足以匡吾君而澤吾民退足以化其鄉而善其俗夫然後於古聖立教之意可以不悖朝廷育才之心可以無負而樊公之建斯院與夫從臾而成之者亦皆有光於無窮矣此固諸生之所以成而斯院之所以久者與書曰事不師古以克永世匪說攸聞故敢以是爲諸生勸敢以是爲將來告樊公名社字介福丁未進士是役也提調者叅戎王公銘督工則都閫魯公勲云

都御史蔡天祐釣魚臺祠記

凡有功於人者祀報之義也醫閭先生教化鄉閭



者四十年異端之教不行焉鄉人爲祠祀之不謂  
義乎先生姓賀諱欽字克恭家醫巫閭山因號焉  
天性高明幼學卽有志於古及見性理羣書朝夕  
玩索而有得乃益自信古聖經書本教躬行不可  
徒自誦說已也乃益厭俗學舉進士爲給事思盡  
厥職有犯無隱成化戊子春京師災乃上疏大畧  
謂應天以實不以文不報遂自劾又不報乃告病  
歸築室圃中取古聖賢書以漸幽討非弔喪問疾  
不出如是者數年大有所得乃教鄉人鄉人故事  
重佛老及諸不經之神先生乃製祀外神文俾祀  
而悉焚之上下翕然從之無梗焉者於是趨門牆  
者日益衆學者始至必詢其奉先祖事父兄之節  
苟簡則亟命改之曰學者學何事也而可緩於是  
耶每謂朱子白鹿洞規爲經書機要小學書爲日  
用準則自修教人一本於是故異端之說無自以  
入而義州之俗獨美弘治初以大學士劉吉薦除  
陝西叅議賜璽書假以便宜會母疾不果行乃條  
陳四事一曰資真儒以講聖學二曰薦賢才以輔  
治道三曰遵祖訓以處內宦四曰興禮樂以化天  
下皆世切要鑿鑿可行疏未上而母疾不起遣子

上之且辭新職許之而寢其言識者有遺憾焉先生好山水每景物熙明輒攜親友遊釣凌溪之澗倘佯竟日歿後五年鄉人思先生者相謂曰吾人之不爲佛老惑者先生功也吾人幸見先生而被其教也先生往矣恐久而忘之吾不忍於吾之身而忘先生也吾子孫不幸不及見先生而不蒙其教也先生往矣恐久而不知之吾不忍吾之子孫不知先生也凌溪先生游樂所也蓋爲祠歲時祀之使吾人接之於目思之於心則先生之教猶在也使吾子孫接之於目思之於心則先生之教亦不敢違也嗚呼先生之功亦大以遠乎哉嘗聞先生學出白沙白沙者廣南陳公甫也史謂陳公甫作詩好奇時人多宗之予生也晚不及登白沙之堂知其人也使白沙而止於作詩好奇也則作詩好奇爲信而先生不作詩好奇所造乃其自得使白沙而不止於作詩好奇也則作詩好奇爲誣而先生不作詩好奇所造乃爲善學因併及之

巡撫王宗彞北鎮廟記

舜卽位分冀醫無閭之地爲幽州於時分州十二各封一山以爲一州之鎮醫無閭山卽幽州之鎮

也按書傳及職方氏俱作無後變無爲巫考之廣寧志云山在城西五里廟在山南今驗地里城西五里無山又云清安寺卽今觀音閣在閭山內去城十二里今閣入山僅二里許則是山距城十里與今地里步數正合而志云五里者傳寫之訛也今廟在山之陽去山五里四分里之一距城三里四分里之三唐開元中封山神爲廣寧公金加封爲王元以閭山密近邦畿大德間加封貞德字歲祀與嶽瀆同元季值兵燹止遺正殿三間我太祖高皇帝洪武二十三年寢殿之南建瓦屋三楹左右司各一間別於廟東建宰牲亭神庫神廚各三間繚以垣牆春秋命有司致祭太宗文皇帝永樂十九年特敕所司撤其舊而創構前殿五間中殿三間後殿七間殿前又構御香殿五間以貯朝廷之降香通爲一臺高丈餘周鑿白石爲欄後殿前左右各建殿五間前殿前東西各建左右司十一間又建神馬門及外垣磚甃朱門通二層入門以漸而高就地勢爲之也歷歲滋久鴛瓦日脫椽木漸朽簷宇傾垂梁棟欹斜每遇霪雨浸及神座先是守臣以邊事旁午不暇及此成化戊戌鎮守太

監韋公朗自開原遷此到任三日謁廟觀之惕然不寧謂前巡撫陳公鉞總戎緱公謙曰吾輩奉命守是方爲神人所依今一方山鎮之神廟壞弗安則鎮守之臣豈得自安乎是當急爲修葺也二公是之於是命官董其事鳩工市材凡殿宇及左右司門牆朽腐者撤而易之傾斜者扶而正之損者修之葺之廢者營之補之又得監鎗監丞洪義總儲郎中金迪協守叅將崔勝咸加贊襄之力材用不取所司工力不勞軍士經始於是年秋九月落成於成化癸卯夏四月廟貌煥然一新告成之日太監與總戎請予紀其事以垂於後用是記之

文貴普陀寺觀音閣記

錦城西北有巨山壁立千尋蔥蒨如繪中函一洞深廣可半畝許洞西丈餘懸崖下垂而內空若穹廬然洞下左側則泉一泓甘冽可飲真洞天福地也昔人於此曾造置尺許石佛百餘故謂之石堂道院正統初鎮守太監王彥嘉茲勝槩屬備禦都指揮李真等庀財鳩工大啓招提之境於洞中土範菩薩羅漢具番漢老少像於崖下木鏤千手千眼觀音被以渾金貯以傑構山頭樓閣參差山下

河流縈繞婆娑草樹幾於紫色琅玕歷亂山禽或似雪衣鸚鵡客有遊南海普陀落伽山者以爲似之因名普陀寺而鄉人悉以觀音洞稱焉寺內古松數株冬雪覆之青白可愛石堂松雪爲錦州八景之一者此也成化己丑庚寅間余恒此下帷至乙未南宮弋獲歷任中外者四十八年嘉靖改元春予告旋里暇日復往訪焉見崢嶸者傾隕輝煌者剝落大非當年比矣感嘆之餘因誦劉夢得再遊元都觀絕句主僧福堅聞之曰種桃道士故在請爲劉郎芟去免葵雁麥重栽桃千樹何如余曰

甚善渠遂謀之檀那金鳳閣鉞欣然倡輸協力營辦適本城指揮寧遠備禦亦施送椽櫨各百餘事工甫就緒而福堅寂矣賴舊住持戒昇與弟子福緣踵其蹟黽勉同心仍向城廛鄰堡勸助口食人工就山中燒造甄瓦爲岩下大士創閣一座明一暗三重檐轉角壁砌圻墁一出閭鉞之手規制雖不甚弘而間架翬飛塗飾藻麗非尋常可擬也肇工於嘉靖乙酉之夏竣事於戊子之秋金鳳邀上舍李翥之謁余求記余以頭白歸來值此輪奐一新乃匡山讀書處致足樂也故述其建寺改名之

由及造閣歲月始終俾刻之石以示來遊者

大學士金湯王佐大望海寺記

塢山爲寧遠屬城去城西南八里許松山在焉寺居山之陽東望大海極目千里溪谷縈紆土地沃衍實勝境也兵燹之餘汨沒於斷蓬枯草間者非一日而遺址尚存景泰改元之初有僧印靜者飛錫至此徘徊瞻眺目睹而心悅之遂結草爲廬坐臥三載一夕忽夢神人呼之引至平曠地指示古井云內有古物師凌晨汲之果得銅鐘一枚題曰至正十四年四月吉日松山大望海寺住持興善

其列名餘僧仍不下百人始知望海寺古刹也塢山指揮李君榮白副將東寧伯焦公卽具木石命工重建佛殿廣設僧堂命印靜爲住持以率僧衆事甫畢而師圓寂矣不數年舊業多圯其徒義聰重新之外立觀音閣掘地復得饒鉢螺磬十餘事題曰泰和四年三月吉日敕賜松山法華禪寺住持如賢此蓋文宗時物意者茲寺舊名法華而曰大望海者宋元間所更乎無碑志可考傳疑可也指揮楊君宗白叅將盛公銘命致政百戶羅海義官王政董匠事毀者飭之缺者增之傍立鐘鼓樓

閣廡其左右而門其前繚以四垣鼎鼎然東北一  
鉅麗觀也又命石工沈賢礱石爲碑記其事以垂  
不朽始於景泰初元而成於弘治九載以世而計  
則二以歲而計則四十有七以匠石工費而計不  
下數千百緡成之不易如此謀雖成於印靜而業  
實創於焦公事雖畢於義聰而功實成於盛公也  
嗣義聰之後者當思前人勦業之甚難後人守成  
之不易哉

繆天成關王廟記

後漢前將軍關公當漢步旣蹶之秋人思逐鹿公  
慨然有興復大志邂逅中山靖王之裔遂與涿人  
張飛約爲兄弟誓同生死共事昭烈卒成鼎足中  
道而殂後人欽公祀以爲神至宋大觀中追封武  
安王廟號義勇迄今數百年普天率土建廟貌以  
奉香火不啻千百計爲文以頌厥功膾炙人口亦  
不啻千萬言奚俟愚後學小子喋喋稱述哉雖然  
公之大忠大勇炳如日星人皆仰之矣抑知乃公  
之大智成之乎當獻帝暗弱天下瓜分功名之士  
誰不擇強盛者事之曹操挾天子令諸侯煨甲礪  
刃雄據中原孫權習父兄累世之資跨長江天塹

之險奄有江左如紹術輩亦皆割地稱雄互相虎視公視之直如狐鼠耳昭烈身不階尺土萍寄於小沛星散於徐州敗新野走當陽依江夏天下無投足之地公獨患難相從心如金石當時以成敗論者方爭噓其愚而公之智則有莫大於此者蓋昭烈不得與羣雄較者一羣雄不得與昭烈較者二帶甲控弦誇強賈勇昭烈固不與羣雄埒矣然而昭烈天潢的派統緒所歸應天順人名正言順彼竊據土宇睥睨神器者以臣抗君以逆犯順將孰與昭烈較且昭烈鼓仁鬯義開誠布公聯屬人

心深固根本而操之奸孫之褊紹無斷而寡謀術剛愎而自用又孰與昭烈較哉惟公獨秉大智蚤見及此故舍強盛就孤窮逐草竊扶正統爵祿不能縻冶麗不能惑金幣不能畱危難不能奪其操死亾不能回其志幸而掃除僭偽廓清海宇闢乾坤於再造揭日月以重光以綿漢家如蒂如髮之祀其心固盡而爲漢之功臣卽不幸而曆數有定景命難諶帝業茂期捐軀報主獲與漢九廟君臣同遊於地下其心亦盡而不失爲漢之純臣然則公之智何其卓乎向使智不及此失身吳魏縱樹



有鴻功偉伐亦與夏侯惇周瑜輩伍耳烏能歷千  
百世爲人敬仰如斯耶嗚呼公之智在生前已嚴  
正僞之辨公之智在後世必明戰守之宜我遼海  
爲神京左臂大小武臣非公之忠勇無所矜式遠  
近屬國非公之威靈無以震懾况錦尤邊境要衝  
乎故卜城西勝地襟山帶水築廟妥公以爲一方  
保障起於成化大於弘治兩新於萬曆前後凡四  
舉矣今衛人遊擊王公汲倡謀高公眞繼之教諭  
張君志廸庠生紀君大學山右客陳君舜等皆捐  
資以助應更新者更之應仍舊者仍之門樓三楹  
則所增建也一時廊廡森嚴牆垣繚繞丹青與山  
色齊輝鈴鐸共河聲相答跂如翼如巍然煥然視  
昔蓋改觀哉興工於萬曆己酉仲春竣事於辛亥  
孟秋故記

給事中周祚遊醫巫閭山記

嘉靖九年九月給事周子按遼東事至醫巫閭之  
地適侍御謝子以觀風至地官寇子以督餉至周  
子曰宿美醫巫閭之美請觀之謝子寇子曰盍觀  
乎以三子似宜觀也乃盟是月二十二日遂至觀  
音閣觀音閣者醫巫閭之勝也崑岫萬狀盡出天

上三子登且觀飲酒而樂周子曰觀而樂矣有感乎謝子曰吾觀其山之穴哈焉呀焉嶽焉嶽焉空空焉洞洞焉其風氣所出乎寇子曰吾觀其山之土穹如窿如墳如礪如熯熯如焯焯如其物類由產乎周子曰吾觀其山之形隩爾室爾嶄爾截爾峯律爾兀結爾開而磅礴爾聚而輪菌爾其封守攸藉乎感止是耶謝子曰吾觀而風氣俗所攸寓矣吾知其理而已矣寇子曰吾觀而物類財所自生矣吾知其用而已矣周子曰吾觀而封守國所自設矣吾知其防而已矣吾三子是觀蓋不多乎夫遊觀外蹟也而所感各有道焉則觀其可已乎內外者道也消息者亦道也知所理則知所亂知所用則知所缺知所防則知所失是又不可懼矣乎時同遊監軍王公總鎮劉公起而曰三子之言近道矣非徒觀也是宜書周子歸因書爲遊醫巫閭山記

御史程啓克遊千山記

千山在遼陽城南六十里秀峯疊嶂綿亘數百里東引甌脫南抱遼陽巖業翁鬱時有佳氣如海蜃然嘉靖丁亥予戍撫順丙申遷蓋州道出遼陽乃

與同志徐劉二子遊焉出南門過八里莊石門釣  
魚臺臺蓋屯戍舊址也東北有溫泉瑩潔可鑑南  
折入山數里抵祖越寺路頗峻稍憇於寺之禪堂  
乃登萬佛閣閣在山半緣崖旋轉越飛梁而入凭  
欄四望天風冷然因宿於寺時戊子日也循東山  
望螺峯附太極石入岩澗高不滿丈深倍之廣半  
俯看萬佛閣已在下方矣前有亭曰一覽自一覽  
亭迤西而北入龍泉寺晡時往香巖亂溪而東岩  
壑窈窕僧房半出雲間扶杖登之明晨己丑寺僧  
設齋乃行憇大樹下人境空寂翛然有遺世之想

東峯危險徐劉二子浮白引滿其間適有吹笳者  
聲振林樾聞之愀然由此至大安自東而北自龍  
泉至此約二十餘里陡絕汚陷懸厓怪石後先相  
倚撫孤山瞰深壑奇花異卉錯雜如繡行復數里  
隍堂中開諸山羅列高爽清曠視三寺爲最西峯  
空洞倚天徐子題曰通明天是夕有雨意翼日庚  
寅晴霽登中峯顧瞻京國遠眺荒徼山海混茫無  
際東有羅漢洞高寒襲人又數息至雙井一在樹  
下一在亂石間泉甚甘冽又數息抵仙人臺峭壁  
斷崖北隅以木梯登望之股栗健者匍匐而上有

石枰九仙環奕焉自仙人臺尋中會寺入溪穿石  
荆棘塞路不可杖徑僅容雙趾以疋布縛胸使人  
從後挽之扶籐側足盤跚而步危甚劉子先之徐  
子與余相去數武摘山花以詩贈余余亦倚聲和  
之跌坐石上一老進麥餅值飢食之厭問其姓氏  
笑而不答乃至寺自大安山行幾二十里困憊坐  
僧房久之起視山岡兩浮屠相向爭聳乃自中會  
返祖越從者病取道石橋宿南村農家回望諸峯  
如在天上矣茲山之勝弘潤秀麗磅礴盤結不可  
殫述使在中州當與五嶽等僻在東隅高人遊士  
罕至焉物理之幸不幸何如也昔柳州山水以子  
厚顯予之劣陋弗克傳其勝姑撮其大槩如此

皇清

大學士剛林

敕建護國四塔永光廣慈延壽法輪四寺記

夫幽谷無私有至斯響洪鐘虛受無叩不鳴而况  
於法身圓對規矩冥立一音稱物宮商潛運故如  
來利見迦維託生王室凭五行之軾拯溺游川開  
八正之門大庇交喪法力維持乎八極慈威鎮攝  
乎羣魔大智靜涵靈源曾挹

聖王道濟蒼生化隆無外念茲功德允合瞻依  
特敕工部遴委喇麻悉不遮朝兒吉畢力免朗蘇相  
度鳩工於

盛京四面各建莊嚴寶寺每寺中大佛一尊左右佛  
二尊菩薩八尊天王四位浮屠一座東爲慧燈朗  
照名曰永光寺南爲普安衆庶名曰廣慈寺西爲  
虔祝

聖壽名曰延壽寺北爲流通正法名曰法輪寺各立  
穹碑永垂來禩銘曰

皇圖肇啓

寶域弘開

仰茲佛日

躋於春臺

雨暘時敘 國無禳災 三途靡惑 五福斯來  
府尹陳一炳普度寺記

寺以普度稱其義何居蓋以千萬億衆生皆有佛  
性不能自度而佛代度之千萬億國土不能同度  
而佛普度之故有過去身未來身現在身菩薩身  
變而八萬四千母陀羅臂八萬四千清靜寶日日  
之所視手之所指一一有佛也於是人心感發興  
起然則象教之設殆爲中人以下者說法耶雖然  
佛之思聞妙湛未可以色相見詎可以分數計乎  
千萬億身無異於一身也豈惟無異於一身並無

異於無身也特以羣愚蒙昧不假象教莫喻津梁故現爲招提以示度之地現爲苾芻以示度之人現爲白拂朱藤珊瑚寶炬以示度之物乃今日浮屠建刹營像卒不識曾度爲何義則猶之乎無佛爾已

盛京僧籙師綿居鮑家庵經營修建二十餘載以曾度名其寺其言曰人至末劫備罹苦惱衲子不能度仗佛之慈悲以度之衆生庶有瘳乎余承乏奉天京尹值寺功告成之日棟宇修潔金碧莊嚴見者無不搏頰頓纓涕泣歸命益信佛之思聞妙湛卽在有色有相中而師亦能自度度人得法乘三昧者因說曾度之義以記之

漕運總督郡人蔡士英大士庵法像記

康熙丙午春予請假出關省視塋墓因過寧遠城西北隅有上帝廟廟傍有大士庵自兵火以來荆棘瓦礫之場也僧圓福者苦行力耕因而鼎新其棟宇權輿其法像而滿月之容尚虛丹彩青蓮之座未遂莊嚴予捐貲五十金用襄勝果三伏之辰僧以竣事來告且礱石請記夫予之過茲庵偶也其見像之未成而遂成之亦偶也僧不言予且忘

之矣夫何記哉且夫爲浮屠之說者類以福報爲期君子弗道也又何事記之以傳後乃謂之曰是舉也予非以邀福非以求名也良以予之去鄉也久而身親兵革見荒涼蕭瑟之狀輒有感於予心故凡在鄉之左右者一草一木皆欲得而滋培之一瓦一石皆願得而修治之况其爲象教之所憑瞻仰之所宗者乎故予斯舉不從僧起不從佛生也何記焉客有聞是語者曰是可以告故鄉諸君子矣乃筆之以爲記

府尹梁拱辰奉天府文廟記

予讀班史有曰文德者帝王之利器武功其輔也余則以爲武功者帝王之利器所以開治者也文德所以保治者也武功之所定者遠文德之所化者深漢唐以來莫不皆然我

太祖武皇帝之起於東陲也始以武功定全遼於學校未遑也

太宗文皇帝修建廟學而文教聿興

世祖章皇帝平定方夏首崇文治改衛爲

盛京設立師儒以訓子弟

今上卽位多士克生先後繼美文明之化日隆而文

盛京通志 卷之第三十二 詩  
廟漸圯前後京兆以請時兵餉方殷增華有待猶  
眷眷不怠特

諭守臣設法修建至康熙十八年秋予再奉  
命尹茲土乃奉行前

旨率二府二州七縣之官儒紳士捐俸出財修治之  
於是

聖殿櫺星門暨四周垣牆皆鼎新焉師儒得以瞻仰  
人士得以矜式豈非武功定而文德興乎然予觀  
詩人所言景員之祥發於殷土生民之慶本於姜  
嫄則

本朝之肇基必有出於武功之先者也今也武功已  
定文教復興人才於是輩出治化於是休隆矣然  
予願司教者之求其實也夫詩書禮樂非徒以飭  
容觀琴瑟笙簧非徒以美聲律要以調習其性情  
消釋其鄙戾使之居家處鄉則有孝恭禮遜之行  
服官蒞政則有公忠廉仁之節斯學校爲育材之  
區人士有治平之任不然雖實枚其磨礱閱泚其  
宮宇亦何益乎若溺於文辭習於佻達此又人才  
風俗所由敗壞者不可不豫爲防也

府尹高爾位奉天府學兩廡記



國家以人才爲本而人才以教化爲先自古培植人才靡不以學校爲亟亟况

龍興發祥之地將相名臣先後蔚起則宮牆俎豆之規有司又安敢不加之意哉位自順治丁亥叨列仕籍歷躋京尹膺豐沛之重任思廣殖戶口以培元氣凡無藝之征侵漁之弊以次釐剔夙夜兢兢與諸僚屬飲冰茹蘗庶幾杜苞苴而絕耗羨仰報皇上加惠元元至意恭惟我

太祖武皇帝以武功肇基遼左逮

太宗文皇帝纘承鴻業建修文廟

世祖章皇帝撫御區夏以瀋陽爲

盛京設京兆立州縣置師儒於時從龍碩彥彬彬濟濟我

皇上臨雍講學尊禮

先師可稱盛矣惟是奉天文廟肇創之初大殿雖已告成而兩廡尚未營構夫崇祀先哲所以式後進也恢宏廟貌所以肅觀瞻也邇者

皇威赫濯干羽兩階聲教四訖行見比戶弦歌盛於曩時式廓前規尤在今日顧念長吏俸入僅足養廉文武青衿率多貧士又難以營度之功重煩我

盛京通志 卷之第三十二  
父老子弟於是獨捐薄俸飭材庀工補建兩廡各  
三楹列諸賢之主而祭器亦具焉多士瞻仰之餘  
庶其景行往哲濯磨砥礪以襄

聖天子升平之治乎是役也肇於壬戌七月至九月  
告竣謹勒諸貞石用垂不朽

知州楊名聲寧遠州署記

寧遠關東一要會也首山峙其東大海襟其南西  
距榆關北接邊鄙層巒疊嶂隱隱隆隆雄麗甲三  
韓爲瀋遼門戶而興廢相尋成毀遞見非獨氣數  
使然亦人事之得失也我

朝定鼎以來招徠流遺念藩衛重地爰立州治以撫  
綏焉余於康熙丁未春來守茲土維時草昧初開  
哀鴻甫集方將宅爾宅田爾田猶未遑也何敢以  
土木勞民爲州署計然臨民出政固陋貽譏人將  
咎余經始之未臧也爰進僚屬而規畫之捐俸鳩  
工集材營繕自門及堂自堂及寢東爲土地祠西  
爲羈候所修葺者十楹增建者二十有六週圍垣  
棘儼然具體不動民間一草一木一絲一粒而四  
旬告竣吏民咸樂觀厥成亦安余之不擾也有謂  
余者曰昔宋詔節度觀察刺史知州等官其治所

解舍修葺建置而不煩民者加一選  
朝廷亦將於公之功加錄焉余曰是則惡乎敢亦曰  
州治新設百度未貞草創規模庶幾無忝於經始  
云爾是爲記

知縣賈弘文鐵嶺縣城隍廟記

按祀典所載禦災捍患勤事定國此皆神之食報  
於一方者也若夫人倫之至歷代師承曾天率土  
春秋匪懈則吾夫子溥海內外家尸戶祝則惟關  
聖城隍之稱於義無攷易泰之上六曰城復於隍  
或卽其義之所自起乎然以城隍稱神府州縣皆

有廟祀則未悉其所由昉也鐵嶺城隍廟建於康  
熙八年顧止正殿三楹耳余蒞斯土每朔望禮神  
周迴審視因思掃地祭天於其質也至嶽瀆諸神  
凡祀典所宜者則皆殿庭廊廡棖桷几筵刲羊豕  
陳籩豆皆以人道事之然則圖其所應有而增其  
所未備顧容緩與乃謀諸紳士之隸茲土與里民  
之好義者議建後寢前軒左右廊中門兩角門大  
門繚以周垣期以次第畢工而廟制備諸若此  
者雖人意爲之而卽神使之也蓋禍福之說不可  
惑而其理則不可不明積善之家必有餘慶積不

善之家必有餘殃此其見於易者也作善降之百  
祥不善降之百殃此其見於書者也祀事孔明介  
爾景福此其見於詩者也儒者好言無鬼神易曰  
知鬼神之情狀有情有狀則固可以人意得今之  
圖所應有增所未備則神之使之豈必耳提面命  
也哉易又曰先王以神道設教亦卽此福善禍淫  
之理耳一縣如是天下亦如是道德英爽上下同  
流凡以導天下於爲善去惡俾

皇祚昌隆景運休嘉云爾工旣竣礮石以記其事

知縣張文治崇興寺復修記

嘗攷遼志廣寧有大寺二其一爲普慈寺在城東  
南隅一則在城東北隅卽雙塔崇興寺是也寺建  
於唐貞觀十八年太宗征高麗旋師命尉遲敬德  
監修併建浮圖二座歷元皇慶明宣德嘉靖間屢  
經修葺規制宏麗故雙塔幻影爲八景之一蓋一  
方勝地也

皇清定鼎燕京以關東爲發祥重地畫郡邑置守令  
而廣寧稱縣治焉余以康熙乙卯秋來蒞茲土甫  
入境流覽山川其氣色鬱鬱葱葱然方振興伊始  
城以內瓦礫荆榛雖觸目橫塞然諸古蹟之廢墜

者其遺址頽基尚可過而問之殘碑斷碣尚得捫而讀之將欲次第修舉特人稀力詘未能驟期諸旦晚間也居無何偶遊此寺見殿舍丘墟壁垣頽塌惟兩浮屠屹然未仆耳後有新建佛殿扃閉而空其中未貌也越歲餘城守鄭公忽造訪曰雙塔寺佛殿塑像未設丹堊未施余已捐資倡衆修之盍往觀焉余因偕往見金碧輝煌丹青絢爛諸佛像無不畢具其偉麗雅與殿稱鄭公請余爲文記之余竊惟

朝廷設官凡以爲地方也廣寧經殘毀之餘其所俟整頓者不一而足官斯土者擇要以圖猶慮力不暇給乃於浮屠之末黽勉從事而欲誇示來茲乎不知天下事有實無益而治之者治之者之過也有似無益而實有益而治之者治之者之功也茲寺由來也遠其關諸形勝也重廣寧急務固多而培形勝以養風氣亦非迂緩而不切於時勢者之爲矣不然唐之太宗創建之歷代修葺之紀載之貞珉具存豈皆不可爲訓也耶鄭公鐵嶺人募緣者僧崇體常學惠元云

知縣周志煥開原縣文廟記

歷觀世之盛也比戶弦歌崇儒明道必自學校始  
鄉學三代異名國學遞仍其號鄉學卽今之郡縣  
學也講道明倫接洙泗之淵源續斯文於不墜人  
倫明於上小民親於下春夏詩書秋冬羽籥養老  
而教射尚德而毓才無不出於是焉典最盛矣值  
今

聖天子稽古右文躬親釋奠

經筵講學博徵碩儒聖賢之道昭明於世誠唐虞三  
代之時也近又奉

俞旨敕滇黔諸省各官捐創學宮使山陬蠻瘴之區

得沾聲教矧

畿輔近地

鑿輿臨幸若開原一邑者而文廟茅茨不剪土階湫  
隘豈所以尊崇

先聖之意乎但斯邑建立未久前任何公金序披荆  
剪棘芟茅屋三楹奉祀聖賢繼任劉公超凡復立  
櫺星門外置左右二坊規模已備惟兩廡神牌俱  
未之設煥司牧是邦踰越二載心懷修葺力不能  
逮今敬捐資購工以瓦易茅飾

聖殿而重新之置四配十哲兩廡先賢先儒神位蓋

盛京通志 卷之第三十二  
欲爲荒邑尚斯文之統以覲揚我

皇上文治之盛卽瞻仰宮牆者或亦有所感發焉

知縣項蕙廣寧縣義學記

余以庚申正月蒞廣寧再閱月規治東隙地將誅茅爲舍招邑子弟而延師教之邑之父老似有疑而議者余悉其狀集諸公廨而問之曰吾儕小人誠不知治要竊見號神君者雖多殊績大抵不過急所當急緩所當緩而已矣我公下車勵精圖治以休息民力爲心乃聞割清俸誅茅爲舍以教邑子弟是近迂非所望於我公也余曰必何務之爲

急曰教民稼穡力作貿易使勿興訟而耗財余曰若輩何知急其所緩正以急其所急也試畧言之吏治衰則民風敝而民風之敝不做於椎魯鄙樸之氓而敝於聰明才智之士椎魯鄙樸者或農或工或商卽上之人不之督迫亦從事焉唯聰明才智者教之農或越其畔教之工或躍其治教之商或折閱其本彼之聰明才智心有所弗屑也其父兄初或溺而縱之繼雖不欲縱業已成習放蕩不可收拾呼朋引類忘三餐所自來視六博爲正業招尤啓釁蕩產傾家其爲害一也又煽惑彼椎魯

鄙樸者爲其所爲相率而從惡以致夫不之督迫而業農業工業商者竟日加督迫而不農不工不商矣游惰滿街淫酗成俗究厥病源實惟戎首其爲害二也况又不但不農而爲之辭曰地瘠不但不工而爲之辭曰力殫不但不商而爲之辭曰貧無母曷子焉从則地不糞真成瘠矣力不用坐成殫矣家無以爲生貧果徹骨矣夫乃緣餬口之艱難致輸公之濡滯爲乾餱之過失起雀鼠之忿爭其爲害三也嗟乎幸而生聰明才智之子弟是人所禱祀而求者而其爲害至此無他不學之過亦

不使之學之過也使之學則彼方澤身禮義之林奮志勲名之路翹翹自命曰吾士也向被其煽惑者榮其若是亦欲從爲士而不可得不得不歸而各業其業從此四民不見異而遷家給人足比屋可封矣余之欲爲舍以教邑子弟者職是故也在所緩耶急耶諸父老乃悅欲子來其事余不可爰興工於三月十二日乙丑落成於三十日巳未舍三楹苦以蘆垣以甃西依縣治東面龍山弁其門曰義學而典史邢君式巡檢秦君涵亦與有力焉異日者踵事增華尤余所望也因筆其經營之始



事而勒諸石

文

皇清

蓋平知縣駱雲祈雨再告城隍文

是年六月之九日禱雨於神至十有一日午刻微雨猶無雨也蓋令某再拜於神而告之曰予小子瀝誠捐吉爲蓋民請雨於神神亦當爲蓋民請雨於帝自今三日甘霖未降予小子智不及尊神不知所出豈司土者德不足以動幽穆而蚩蚩者衆宿因舊業未能被不祥而驅旱魃與抑他方多善

類而此都之人力行未篤難以召天休獲滋至與又豈男者躍冶未盡懲女者垢口未盡滌與因心肆好卽自稱賢達而亦不免與又且尊卑之義未盡明長幼之節未盡著與子不克敬厥父有罰弟不克恭厥兄有讓抑俗尚武健負氣矜能不恤小物與又抑富者權衡取倍貧者見異思遷與此數者蓋之人容有之皆足以致旱予小子不能盡除此數者於蓋而祈靈雨於蓋智誠不及爾尊神聞之一日不食則飢七日不食則死人之恒也願天以雨濟人於飢甚則濟人於死今待之三日不應

更待之三日不應田無苗隴無麥能免異日之飢  
與死與予小子縱不能盡除前此數者於蓋然而  
罪有重輕人有良窳願天以差等之報報之勿槩  
置之飢與死此予小子祈請之意也神其以此上  
聞於天憐其情真詞切而許之再俟三日使終無  
大雨則亦無如之何矣

賦

明

給事中劉琦具瞻亭賦

戊子秋莪峯公與客躋醫閭之山憇於盤石之上

俯瞰滄海仰睇丹崖覽東遼之據勝想重華之肇  
封升降崑崙顧盼杳淼指謂客曰美哉山河卽此  
可以寄覽矣又奚必登絕巘之危哉廼卽其處作  
具瞻亭斥粉堊之施戒雕琢之巧無枚實之工鮮  
土木之擾匪惟怡情縱目實可省俗觀風故賦其  
事以美之乃曰陟西山之巖巖兮摩雲漢之蒼蒼  
挹煙嵐之疊翠兮溥盤錯於淳龐對諸峯之羅立  
兮儼劍戟之森張崔巍萬仞環抱六重勢同插架  
秀壓居庸緬孑然之特出兮顯西域之梵宮臥霏  
霏之煙霄兮驚鶴馭之崆峒聆哀壑之呼號兮響

幽澗之石淙北窺長白南眺蓬瀛孤竹西挽鴨綠  
東滌俯三韓兮跨長城控九區兮拱神京擊澄泓  
兮溯遼水泛素影兮凌河之清至夫丘垤白雲栝  
捲紅螺高並泰岱列勢峩峩基托醫閭兮緯地理  
星分箕尾兮煥天文揖仙人之洞兮擷芝草之香  
薰通聖水之圯兮簇碧波之細紋俯呂公之崑兮  
襲遐壑之芳芬指東丹之臺兮餘萬卷之典墳若  
其鳧鷖振鷺頡頏犴狎佳木异卉高低鬱葱聳麗  
閣倒喬松懸瀑布面長空西風急而暮山紫北鴈  
盡而秋葉紅良辰不再勝槩難逢攀窈巖之危石  
若凌虛之飛鴻迥川澤於盼睐覺宇宙之靡窮亂  
曰鳳凰翱翔兮鷗鷺潛藏魑魅遠遁兮烏雀踟躕  
虎豹斂跡兮濺濺牛羊善韓范之宣撫審憂樂之  
後先威聲揚於雲表惠澤洽於海天將儀型於廊  
廟豈云茲土之具瞻

皇清

海城知縣陳王星田獵賦

盛京大將軍編甲士於金州途次海城獵於邑之北  
原觀其開閣馳驟識

國家用武所由作田獵賦以志其事其詞曰於皇

聖武萬國又康奠干戈於衽席掃蚩尤而培攬搶簡  
親臣於閎閱起元老於東方伊大將軍膺

簡命而作鎮茲土也開三輔之風雲隸八校之精良  
建燾於箕尾之野分符於豐沛之鄉其以藩屏

帝室屹如喬嶽之巨地軸倬如雲漢之麗天章間者  
披輿圖扼紀綱固封圉繫苞桑維金州枕海之隈  
居遼之陽颿風洲嶼儵忽千里實爲地之奧區巖  
疆因而籍編氓於什伍寓兵甲於比閭欲程材而  
角技乃親閱乎封隅虎符先下於澤國羽騎繼發  
而晨趨馳載驟之駸駸揚飛旆之緝緝是時未至

夫金州也委遲周道徐臻乎下邑夫海城者雖息  
壤之荒墟實

陪京之南服繡嶺關其項厝石皤其腹寒泉盪其胸  
湯池燠其足三川合流而入海羣峯競秀而嵯峨  
唐宗東征而駐蹕列仙停奕而爛柯若夫平原曠  
野丘壑叢蠶鹿儲於孟渚茁苜蓿盛於周南儻儻  
俟俟鄭之原圃秦之具囿未擅厥美於前也爾時  
壯士駿發驃騎臚分闢兩翼而開鸛鶴馳七校而  
約藩垣要遮駢衍前後續紛迤邐若驚濤之水輻  
輳若垂天之雲或被陵而緣阪或傾洞而蹈空或

越壑而絕巘或掣電而繳風震震燖燖沈沈溶溶  
什山絡野囊括其中雄雌惕息而戢翼巨細叫哮  
而張喙狡兔迷其三窟封豕失其叢薄磨麋無走  
險之能虎豹無負嵎之畧靡不崩踣委積拏攫枕  
藉蹶殘角落若忘魂褫魄之瞿瞿者於是帥賁育  
之倫往來決拾於其間士齎怒而賈勇馬汗頰而  
逸羣其周阿而上下乎窺巖也造父不敢爲之御  
轡羿氏弗能爲之控弦而乃競跣踵之奇極縱送  
之歡搜巖滌穴驅白澤而走青豸金鏃石弩之所  
磨滅穿雲沒羽之所摧殘決腹斷脰洞胸截肩雨  
血殷乎滿野風毛紛乎蔽天禽彌獸殫然後弭節  
舒御暫憩息乎平田毳帳旣列甲士傳餐次殺獲  
之多寡慰馳驟之便嬛拍豚漉酒擢肉烹鮮染湯  
爛於糜腥薦冰廚之熊蹯勞逸之勢以均上下之  
情復安余以薄劣待罪是邑獲承斯餘烈際此大  
觀也緊思我

國家比三驅之制寓九伐之仁解網罟而泣罪獵熊  
羆而得人故命將出師戰無不克卽鎮臣之偶爾  
遊獵亦旣武且神若是也若夫春蒐冬狩按旗勒  
部且采絡繹步騎旁午聲軋幽都之北威攝扶桑

之圃蓋以彊本而弱支豈僅耀靈而究武洵乎德  
威遠播古今莫覩矣

知縣章經盛京賦

惟幽沛之開基膺天授而御寓握寶籙以乘乾欽  
肇造於

聖祖聿懋昭以文德先赫濯以神武大業者定於永  
年宏功超軼乎振古拓闢朔方又安東土政教覃  
施黔黎綏撫於是瀋水之陽遼濱之上相度川原  
審眎袤廣興言隩區厥地塏爽正向出離規方則  
壤慮力役之下徵詔發金於大帑趨事急於子來

不日成於民往崇墉屹立霞表騫倚峻閣翬飛雲  
中麗峙下臨百尺之甍池上矗千仞之疊雉嬰堞  
資夫巨防結隅稱乎堅壘創四埵兮法日行之四  
陸闢八門兮象地維之八極九重城闕儼然虎豹  
之衛翼六服方輿混若徼荒爲第宅此誠衍沃雄  
圖實惟阨塞固國於時萬里皈心咸霑天澤百靈  
效順仰承

帝德廣運信貞自靡藉乎迅步之測上腴綺錯更莫  
計其收歸之籍櫬槍旣掃景卿咸集弓矢韜干戈  
戢七表寧八荒一熒光塞河慶雲耀日奎聚五緯

喜起百辟豈惟播諸絃誦定已載之史冊緬祥發  
之靈基真形勝之華域羣巖萃嶽聳秀大邦二波  
瀟漫據游

帝鄉歌大風於沛里賦湛露於岐陽擬碧玉兮羅辰  
居恍彤雲兮護天闈燦璇宮之瑞霽兮集錦殿之  
神光規度式崇於太乙兮弘麗奚羨乎未央丹墀  
青瑣班列鴛行紫禁黃扉宿衛龍驤右城左干端  
垂拱於乾綱前朝後市標建極於明堂若夫秩宗  
和神人之典司徒授登耗之書秋署推平反之情  
虞部掌藪澤之區貔貅猛士元戎佩符箕畢異情  
岳牧呈謨庶司各致惠疇羣類咸悅阜儲廓恢侯  
甸輦壯

皇圖請睹雍熙之盛槩已覘恬養之康衢九有淳龐  
營東爲最五達中達三條四會鳴朝士之珂馳勳  
裔之轡錦鞵聯鑣繡幘結駟輪蹄接跡跋涉踵至  
貨殖鱗層闐闐櫛比襍沓紛塵喧闐動地孔道臨  
內庭之命節劇驟過殊方之貢使顥穹葱鬱雲繞蓬  
萊

輦輅幸巡星平泰階山川色騰草木麗裁人習安於  
化域物競躋於春臺余也欣逢翊運恭際昌期謬

榮冒邑備員

京畿觀作豐之景物式在鎬之威儀爰公座之維暇  
聊蘸筆以敷詞

辭

明

都御史李貢蘭英碑辭

蘭英蓋州軍也成化初調廣寧操備九年春隨總  
兵歐拒敵於小黑山敵因風縱火軍潰歐馬中箭  
死兵圍益急英曰主將二軍司命歐公危如大衆  
何乃以所乘馬授歐英遇害越今三十二年矣予

行憲至蓋聞其事而哀之乃刻石於墓而系以辭  
曰王朝之制兮邊守爲嚴遠人窺伺兮匪月伊年  
東閩警動兮揚沙飛塵移師言禦兮將卒鼓行敵  
勢長驅兮縱火用兵主將馬踣兮貫矢於膺耳目  
溷亂兮旌旂失位山川崩沸兮雷霆爲潰何此心  
之耿耿兮持本初而不背等死生於鴻毛兮特昭  
彰乎大義維將士之司命兮國體係夫重輕或纖  
芥之摧辱兮曾何用乎微生我骨可斷兮溝壑是  
橫我血可塗兮原野是腥獨主將之不可死兮遑  
鑒予之衷情期將卒之兩全兮信倉皇之所難矧



盛京通志 卷之第三十二  
鋒鏑之在前兮不可從容而盤桓惟委馬以奉主  
兮冀縱轡而生還豈廝役之受恩兮欲圖報而難  
殫慨羊斟之御主兮抽夙昔之恨端乃戀戀於杯  
羹兮竟致主於相殘顧倉猝之所處兮在恩義爲  
兼盡人孰無死兮要能處之得其正重國事於丘  
山兮匪私情之是徇孰謂廝役之瑣瑣兮保茲忠  
誠之至性自歸骨於荒原兮已三紀其有餘神飄  
飄而長征兮飲沆瀣而康娛俯永世而一息兮侔  
貞烈以爲徒嗟恩膏之未及兮在世道爲何如周  
崇死難兮有門關以及孤漢寵死事兮紛印綬之  
纍纍覽往事以隕涕兮對幽墳而忸怩託貞珉以  
系辭兮慰忠魂於些微

皇清

承德知縣章經巨流河辭

巨流河者古之遼水也其源自西北千里而來縣  
邈紆折激流奔駛勢挾風雷秋晚臨渡感觸曠懷  
因爲辭曰水浩瀚兮瀉長河懷渺渺兮歛然過迅  
電疾兮走龍虬招舟子兮浮中流泱泱無極兮千  
里色塞寒日落兮孤煙直原草白兮水際碧倏杳  
冥兮日將夕叱馭前驅兮何敢憚乎行役

詩

四言

明

盧瓊曾公祠

維帝御極柔遠能邇一夫不獲痾瘵是似蠢茲遼  
人不戢自焚公憫冥頑任禍於身敷奏祈宥脅從  
罔究帝曰俞哉銑拜稽首渠魁以殲衆感以祐保  
茲東土如翼如覆帝曰都哉陟茲功懋銑拜稽首  
天子萬壽農不易業市不易肆以生以育維公之  
賜維罔有栢維麓有砥繩之鑿之維公之祠公惟  
信宿畱公之似我其夙夜罔不敬止匪我思之子  
子孫孫匪民私之旣浹且淪匪公之惠惟帝之仁  
遼其奠安於萬斯春

皇清

知縣章經承署座警

事物糾紛虛其胸臆慎毋擾之和以服德南山有  
松亭亭且直北海有水汪汪不測靜言以思踐其  
所實體而用之近在食息朝斯夕斯勗心修慝

五言古

明

御史程啓充由祖越過龍泉

一逕何盤曲東西亦委蛇危巖嵌蘭若疲馬安能  
馳豈不憚峻險薄言恣探奇清泉濯長纓聊與性  
命期雅有杯中物可以樂我私

皇清

蓋平知縣李鎧鐵嶺屯

攬轡入荒屯云是蓋牟境遠峯霽暮光奇雲澹孤  
影川原殊油油睇日呈煙景顧傷三戶稀蕭然渺  
廬井力薄桑麻瘦氣索茅茨冷伊余甫出塞繁憂  
从耿耿矧茲履其地艱難亦已領撫躬慙京德民

依日溪省

七言古

金

太常寺丞蔡珪醫巫閭山

幽州鎮山高且雄倚天萬仞蟠天東祖龍驅之不  
肯去至今鞭血餘殷紅崩岸暗谷森雲樹蕭寺門  
橫入山路誰道營丘筆有神只得峯巒兩三處我  
方萬里來天涯陂陀繚繞間風沙直教眼界增明  
秀好是嵐光日夕佳

明

御史程啓克具瞻亭歌

高閣倚危巔上與浮雲齊  
林岑疊舞鑿斜逕吞吐  
日月分東西盤旋曲折下復上  
凌空百丈懸天梯  
聳身數息不可到眼花神悸忽如迷  
陽坡寬敞抱山腹羣峯輻湊飛寒瀑  
高人指點歷畫圖結構孤亭縱心曰  
雜芳繞徑搖晴光石龕鍾乳流瓊漿  
開牕攬擷生靈籟自然身世渾相忘  
紫芝黃石爭絢爛啼鳥落花還復見  
煙霞澹宕抱遊人可惜風光自流轉

都督毛倫覽秀亭歌

秋風幾日搖霜樾北鎮西山兩奇絕  
開牕覽秀小亭幽景物撩人自然別  
丹崖翠壑吐仍吞紅雲白草入深垣  
短碑古堦幽蘭裏野店孤春何處村  
荒榛小逕不盈尺谷口縈紆更深入  
蕭蕭木落滿天秋谿壑斷流堆亂石  
山形地脈亦何崇上有千歲之蒼松  
孤高偃蹇傲冰雪秀拔天地輕秦封  
紅霞幾縷吞朝旭突兀高樓斷山曲  
南峯勢壓北峯雄劍戟森然對羣玉  
綵雲縹緲棲蓬萊金闕森羅紫極開  
山空寂寂白晝永野曠落落清風來  
飛簷鈴鐸響朱閣石殿簾櫳開翠幕  
迴峯轉壑挹清溪疊

嶂層巒連碧落山原迢遞千里通萬物蒼茫一望  
中放懷聊取片時適仙境未必人間同白雲一片  
青山小野戍煙霞秋意老林梢幾點認歸鴉天外  
數行橫海島晴時乘興縱登臨與客攜壺共賞心  
海闊天空雲浩浩臺高樹合影沉沉

五言律

明

御史劉成德廣寧懷古

衰草閒仙洞清雲冷誓臺輿圖連朔野烽火靜塵  
埃水自荒沙出山從故國來戍樓鐘報曉笳鼓遞

悲哀

修撰龔用卿遊中會寺

寺遠山僧少叢林草徑深懸崖盤石磴古殿度雲  
岑枝密迴流合巖幽向日陰欲將金印解瀟洒定  
禪心

二

蛇山盤古折綫路繞千尋萬里風雲壯諸天歲月  
深花香浮塔院霞影落丘岑杳杳鐘聲動遙峰擁  
碧林

副使徐景嵩溫泉

萬古溫泉水百年幾度遊  
炎流從地發暖氣欲天  
浮風過亭臺爽山環景物幽  
自憐多病客不是濯纓儔

皇清

府尹梁拱宸觀海

平生觀海志此日遂登臨  
氣象涵天地波濤撼古今  
潮翻迷遠嶼日落見遙岑  
幸得儲舟楫能無利濟心

府丞張鼎彝觀海

夙志懷觀海今來渤海涯  
長風千里浪曉日萬山  
霞島影侵鼉窟潮聲捲岸沙  
朝宗涵地澤王氣拱天家

登醫巫閭

前人

北鎮名山麓嗟峨錦水東  
遙分長白秀直并泰華  
雄日麗羣峰色松吟萬壑風  
從容勤杖屐勝槩正無窮

錦州知府孫成蒞任祈雨甘霖大沛僚屬有以  
隨車謏者作此謝之

敢曰隨車雨偶然相值中羣生  
兼沐浴大氣屬空濛亦覺人情喜  
懸知歲事豐我來應有責詎可冒

天功

宿杏花寺

前人

一徑穿山入疎鐘亦漸聞門迎千嶂色寺繞幾峰  
雲谷葉吹風亂巖花笑日曛老僧耽寂靜似恠客  
紛紜

鐵嶺知縣胡藥嬰觀音洞

山骨知誰鑿儼然成小堂雲涵蒼壁潤蘚覆古苔  
香淨遠龍蛇氣深通日月光穴空懸石髓斑駁盡  
文章

二

洞口人煙渺空濛翠欲浮草香無鹿跡礪古有雲  
流晴日巖常暗鳴禽樹自幽桃花溪谷發漁者未  
容求

廣寧知縣項蕙遊觀音閣

乘興歷危巔上方樓閣連四圍山斷絕一徑鳥飛  
懸覽勝猶疑夢憑虛別有天武陵津問後此地鑿  
何年

海城知縣鄭繡牛莊迎

駕

二首

忽報

盛京通志 卷之三十一  
鑾輿到朝衣出郭東馬蹏如捲浪人耳但聞風水草  
連天碧旌旗匝地紅

至尊方校獵鵠立夕陽中

野曠千官靜塵高萬馬來夔龍依日月虎兕疾風  
雷柳散緹城合燈攢帳殿開歡聲騰父老共覩

帝車回

七言律

明

巡撫馬文升過益州

煙霧初消海國邊荒原寒水與雲連山光杳靄飛  
鳧外秋色參差落雁前田野歡呼瞻使節公庭空  
寂長苔錢從容事畢還朝日韶舞聲中覲九天

御史郭登庸望京樓

雨洗沙場兵氣收天涯秋暮獨登樓四方煙井聽  
雞犬百里晴郊散馬牛斷壠黃雲依古戍孤城斜  
日射寒流滄溟寂寞魚龍伏回首西南望帝州

少卿徐文華遊祖越寺

雲煙迴合水潺湲路轉陂陀百折還上界鐘聲霄  
漢杳前山塢影夕陽間松濤漲壑千巖響花雨浮  
空滿地斑坐从虛堂疑誤入恍然身世出人寰



給事中吳希孟宿大安有懷

奇石蒼松世界分  
千山虎豹散狼羣  
洞前黑白萬林雨  
壇上浮沉一篆芸  
鐘盡漏隨莊室  
蝶心依神會  
栢臺雲清樽舊約  
逾三月何日叅軍細論文

皇清

府丞姜希轍浴金湯溫泉

首山山下水涓涓  
煖氣翻騰珠露圓  
日護輕寒溫室樹  
雲飛廣漠華清泉  
畫欄時遶靈川色  
碧瓦平浮玉井煙  
披滌塵襟清客况  
春風已覺沐恩偏  
府丞張鼎彝將至奉天雪霽

春寒匝月逐行旌  
歷盡邊霜近

帝城昨夜雪凝丹  
鳳隱今朝日麗紫  
雲晴遙瞻王氣連  
三島欲起人文並  
兩京料得兔且成  
化後豐鎬樸棧應期生

北鎮祠

前人

荒臺碧草映階垂  
華表猶存北鎮祠  
禮肇虞廷齊岱嶽  
煙迷海日暗龍螭  
青松蔭老千年樹  
白石苔深歷代碑  
已飭明禋馨俎豆  
何時輪奐肅壇壝

登祖越寺

前人

古刹環羅嶂幾重  
簷前恰對貴人峯  
煙岑歷亂迎

朝旭鳥語喧闐雜壑松拳石孤懸開極始振衣直  
欲問山宗林巒處處饒幽勝安得探奇徧策筇

錦州知府孫成觀音洞

林麓蒙茸徑轉深青山偏自解招尋石塘無地畱  
松影洞水涵雲浣客心秋色漸高蒼靄散翠微平  
對暮煙沉流連徙倚頻移席何日還期一再臨

錦州通判朱夢熊廣濟寺塔

卓立浮屠靄夕暉諸天景物望中微憑陵幾見川  
原改剝落頻經劫火飛雨散天花衣欲濕光含舍  
利鳥知皈寄言華表峰頭鶴城郭人民是與非

蓋平知縣駱雲連雲島望海

水勢西從碣石來雲山沙磧重徘徊龍門雨洗刀  
兵後鰲背風翻星斗回民瘠未收珍府利官憂空  
作委輸裁子期何在畱岑寂疑有琴聲響石臺

廣寧知縣項蕙謁北鎮廟

山靈無恙氣氤氳古廟松楸宿白雲斷碣猶存梁  
父禪劫灰難認嶧山文不辭登眺尋僧話尚有林  
巒待鹿羣感慨相傳思往事悲鳴雲際雁紛紛

錦州府教授張樞廣寧道中望醫巫閭山

遙望醫閭天際峯青山疊疊白雲濃背連沙磧岡

陵遠面對蓬瀛煙霧重

王氣氤氳躔

北極神靈縹緲憶虞封登臨定可開心目一覽

皇都大幹龍

五言絕句

元

閻長言婆娑道中

泉源疏地脈土壠上山腰敗石平危徑枯柴補斷

橋

明

大學士孫承宗過錦州

錦水波初靜高軒向此過似聞城郭是東去竟如

何

御史程啓克下香巖

危途長側足高處更回頭行路難如此何時臥故

丘

七言絕句

遼

李晏平州中和館後草亭

藤花滿地香仍在松影拂雲寒未收山鳥似嫌遊

客到一聲啼破小亭幽

皇清

詹事沈荃奉使祭告事竣遊閭山清安寺登大

士閣

聞說閭山第一峯蒼崖終古白雲封天風忽起松  
濤落下界回看隔幾重

山閣層層架石梁洞門窅窅瀑飛涼攀蘿直上三  
千尺鳥語花香白晝長

寧遠溫泉

前人

首山南麓有湯泉煖霧騰空亂曉煙野寺荒原題

句少一泓靈液自涓涓

塞北溫池不易逢解衣晞髮且從容漁陽昨歲陪  
鑾處白石清泉鎖翠峯

錦州知府孫成十三山

峩峩天外見芙蓉夜雨新添螺黛重自是閭山行  
盡處畫圖雲擁十三峯

景祐宮道士苗君稷秋日望

昭陵詩

攬轡秋風聽野歌雄圖開闢

太宗多遙知王氣歸遼海不戰中原自倒戈

五雲西向接幽燕八月秋光麗遠天豐鎬三登涑  
雨露車書萬國靜烽煙

龍蟠翠嶂鬱岩堯路夾蒼松白玉橋十二羽林嚴  
侍衛風嘶鐵馬白雲霄

五言排律

皇清

開原縣知縣周志煥威遠堡朝

駕恭賦

邊庭迎

帝輦朝賀已三更駕羽聯班肅鴻臚引奏清馬嘶青

嶂地人臥綠苔營萬騎隨

鑿輅千官聽漏聲荒屯成壯麗行幄儼都城宣拜

天顏近晨昏瑞露盈懸旌非耀武控馭若觀兵扈從

丹衷切神馳到

玉京

王

石

天

盤

石



